



## Cukai jualan dalam talian hanya pada produk import - Fahmi

Disember 17, 2023 @ 1:53pm

KUALA LUMPUR: Cukai jualan 10 peratus bagi pembelian dalam talian yang berkuat kuasa 1 Januari 2024 hanya terpakai bagi produk yang diimport bernilai RM500 ke bawah.

Menteri Komunikasi, Fahmi Fadzil, berkata ini bagi memastikan daya saing produk tempatan dapat ditingkatkan dan cukai itu tidak memberi kesan kepada produk dalam negara yang dibeli secara dalam talian.

"Yang penting untuk dijelaskan ini hanya terpakai bagi produk import yang dijual secara dalam talian di Malaysia. Produk yang dihasilkan di dalam negara tidak terkesan. Jadi, saya harap ini dapat kurangkan salah faham dalam kalangan masyarakat tentang cukai tersebut.

"Kita boleh rujuk laman rasmi Jabatan Kastam untuk maklumat lebih terperinci dan dari semasa ke semasa kita akan pantau untuk pastikan adakah rakyat terutama penjual dan pembeli yang laksanakan transaksi dalam talian benar-benar faham mengapa ini dilaksanakan dan apa kategori produk yang terkesan," katanya.

Fahmi yang juga jurucakap Kerajaan Perpaduan berkata demikian pada sidang media selepas merasmikan program 'Reuse, Educate, Nurture and Empower with Waste' (R.E.N.E.W) di sini hari ini.

Semalam, Jabatan Kastam Diraja Malaysia (JKDM) memaklumkan negara akan mula mengenakan cukai jualan sebanyak 10 peratus ke atas barang bernilai rendah (LVG) diimport yang dijual secara dalam talian mulai 1 Januari 2024.

Mengenai program R.E.N.E.W anjuran Institut Pengajian Profesional Pendidikan Berterusan (iCEPS) Universiti Teknologi MARA (UiTM), Fahmi yang juga Ahli Parlimen Lembah Pantai berkata program itu merupakan insiatif yang baik ke arah melestarikan alam sekitar.

Beliau berkata, program kesedaran mengenai minyak masak terpakai itu difahamkan berjaya mengumpul lebih 100 kilogram (kg) minyak masak terpakai semalam, sekali gus mencerminkan peningkatan kesedaran masyarakat setempat di sekitar Lembah Pantai terhadap aspek pengurusan minyak masak terpakai.

Turut hadir Pengarah Jabatan Projek Khas dan Pembangunan Perniagaan iCEPS merangkap Penasihat Program R.E.N.E.W, Shira Haniza Yakcop. – BERNAMA